

張山雷撰

瘍科綱要

上海衛生出版社

張山雷撰

瘍科綱



上海衛生出版社

內 容 提 要

作者爲近時已故名醫，於外科尤具心得，其主張治外瘍必先通內科學爲主，實爲不磨之論。本書在當時曾一再印行（初版 1927 年），屢獲好評，是一本有貢獻於外科學的著作。

全書共二卷，分四章。第一章總論 從外瘍證狀的不同及膿血滋水色澤形質的辨別，分列十一節，統論其病理、診斷與治療；第二章脉狀 依據脉狀的不同，分列十六節，闡述其與外瘍之呼應聯系，從而辨證施治，第三章藥劑 分列十三節，從總的內服、外治在瘍症中的效用，以迄退消提托之不同施用，治痰清熱理濕溫養之分別處治，更進而論述一般通用丸散的利弊；第四章膏丹丸散方 根據效用及病症，分列十一節，介紹敷貼吹搽及內服方六十六張，詳述了方藥的配合、使用、貯藏等方法。

本書立論簡要，辨證精確，是作者長期臨床實踐的經驗心得，介紹的方劑，也是一家私傳的效方，不尚浮論，切合實用。茲特重校印行，以供外科臨床醫師的參考。

瘍 科 綱 要

張 山 雷 撰

*

上 海 衛 生 出 版 社 出 版

（上海南京西路 2004 號）

上海市書刊出版業營業許可證出 080 號

上海鐵路局印刷廠印刷 新華書店上海發行所總經售

*

開本 787×1092 耗 1/32 印張 3 1/2 字數 55,000

1958 年 7 月新 1 版 1958 年 7 月第 1 次印刷

印數 1—3,000

統一書號 14120·455

定價（9）0.42 元

鄭序

自昔醫科。輒分內外。金鑑之外科心法。陳氏之外科正宗。皆爲治瘍專書。此固稍治醫學者所共知也。顧余以爲臟腑之癰疽。實發於人身內部。卽皮膚之瘡毒。亦多本乎內因。若必別之爲外。立名似失其正。治法又何能精。今觀嘉定明工張山雷先生之瘍科綱要。開宗明義。已得其旨。先生以清諸生而精研醫學。歷主蘭谿醫校教席十餘年。編有傷寒溫熱虛人感冒。陽明經病府病。斑疹癰痧。瘡痢霍亂。濕溫眩暈。諸火。虛火類中風。血冲腦。病理學。醫論稿。白喉決疑。瘍案平議。諸科講義。獨據偉論。暢發經旨。故出其門者。皆名噪於時。又著有本草脉學兩正義。談醫經穴兩考正。中風斟詮。籀彙醫話。醫事蒙求等篇。各若干卷。風行於世。皆本積學心得。不拾他人牙慧。發前賢未言之奧。破諸家塗附之迷。啓後學之性靈。登斯民於壽域。時賢諸著。罕有出其右者。瘍科綱要。又其傑作之一也。辨證首重陰陽。必觀其人之氣體虛實。病源淺深。察色辨脉。兼驗舌苔。以爲定論。不爲部位形色所拘。腫痛發癢。痠楚頑木。膿之成否。色質若何。潰瘍血水。六淫脉狀。各有專論。辨之綦詳。變幻離奇。千態萬狀。莫不繪聲繪影。眉目分明。至若主治諸方。則師承有自。必以內證爲主。隨其寒熱虛實。七情六淫。氣血痰濕諸證。而調劑之。其論消腫化膿。行氣治痰。清熱理濕。溫養補益。提膿托毒。清養胃家等法。條分縷析。探本窮源。議論高超。理法精密。選用各藥。內服外施。諸法悉備。措置咸宜。誠瘍學之總綱。治瘍之要領也。獨惜先生壽纔逾甲。遽歸道山。如春蠶早殞。絲未

盡吐。豈天地之秘。終不許人透泄歟。猶幸後起有人。善繼述而廣其傳。則先生之精神。仍長留宇宙間也。茲緣是書售罄。其門下館甥邵君樂山。從事續梓。以期壽世。不以余譾陋而索題弁言。謹書所見以歸之。第愧不文。未足表其仁術之萬一耳。

乙亥春月後學南海鄭召棠謹序

自序

瘍科本是醫學之一子目。晚近來高明之士。大都薄此不爲。而號爲專科者。遂自囿於淺近。惟以翦割刀鍼。去腐生肌爲能事。似乎卑之無甚高論矣。抑知證雖外發。病本內因。固不僅大癰大疽。非通乎內科學者。不能措手。卽尋常瘡癰。亦無不與內證息息相通。豈可專治其外。而謂可有全績。且內病外瘍。更多相因而至。有內外交病而爲瘍者。有內病變遷而爲瘍者。亦有內科誤治而釀成外瘍者。更又有內科兼證。不知兼治。而並生外瘍者。彼其知有外不知有內。固未免自安於謫陋。而僅知其內不知其外。亦殊是醫學之缺憾矣。當夫漢唐以上醫學家言。本未聞分科論治。試觀金匱病源千金外臺等書。豈非內科學之總匯。而癰疽瘡瘍。皆其子目之一。是爲內外二科並不分途之明證。迨至宋金以降。始有瘍科專書。得毋小道伎倆。道愈下而術愈陋乎。觀夫市肆通行之外瘍諸書。非不卷帙繁重。然欲求其精切合用。可以救危證而起沈疴者。頗難其選。蓋自有治瘍之專科。而所見已小。學術已疎。宜乎多皮相而少精蘊矣。如李氏之集方。齊氏之精義。寶氏之經驗。王氏之準繩。顧氏之大全。金鑑之心法。皆舉世所奉爲瘍醫之金科玉律者也。然按之實際。何嘗有確切之發明。此外俗書。更無論矣。又如腦疽背疽。固是瘍門大證。其部位屬於太陽寒水之經。雖外形亦或紅腫焮發。而病者皆脉細舌白。於法必當溫經宣托。方免內陷。誤投涼藥。危證立見。此與唐人喜服金石藥而蘊毒之發背大異。然古近各書。皆仍金石發之舊例。治法悉宗涼

解。此則誤盡蒼生之尤者。近僅見荆溪余氏聽鴻輯刻青浦陳學山醫案。

書名外證
醫案集編

注重內證論治。一洗

外科通用套方之陋。理法精密。頗得治瘍正軌。惟其書僅錄煎劑。不詳外治方藥。尙未足爲學者益智之機。壽頤業師同邑黃牆邨朱闡仙先生。世以兼治外瘍著名。久爲東南物望。家學淵源。誠非庸俗可比。而亦非通行之外科各書。能盡其奧。壽頤從學有年。始信徐洄溪所謂治瘍必得秘授之說爲不虛。然見證治證。亦不過理法清晰。措置合宜而已。非必有不可思議。出人意表之奇異也。間又出而訪之聞人。則近時青浦珠街閣陳蓮舫之治瘍。亦頗與敝師門同符合轍。而余聽鴻之持論。陳學山之方案。更多心心相印。於此知至理自在人間。瘍醫中固有此正法眼藏。本非一家獨得其秘。惜乎庸俗之治瘍者。多未能明見及此。則皆自安於淺近。而不求精進之過也。壽頤習之三十年。久思自吾得之。必欲自吾傳之。庶乎瘍醫雖小道中之末伎。而亦得樹之正鵠。傳之通人。可以掄痛苦而拯危疴。是一絕大快事。於是本諸師門心法。而益之以半生經驗。攝其大要。纂爲專書。務必說盡精微。一泄此中真理。誓不以家秘自私。竟效俗人惡習。而古人持論之切中肯綮者。必並錄之。示不敢墨守一家之學。致有蔑古之嫌。惟甲乙經所載癰疽諸名稱。最多怪誕。不可索解。後人因其爲靈樞所有。無不仍其名稱。特立一條而敷衍之。如甘疽并疽之屬。多不足據。卽巢氏病源候癰疽一篇。亦多奇異名詞。平心論之。無甚意義可取。且亦壽頤臨證三十餘年而未曾一見者。則不敢徒事抄胥。肆其空議。以自欺欺人。要之古書中已未免有難信之語。必不可墨守陳言。如塗塗附。毋甯缺之。是則壽頤務求切實有用。不欲以空言惑世之本旨也。或謂西學日昌。治

瘍久推獨步。已爲當世所公認。子又何必守此故物。敝帚自珍。頤則敢正告之曰。新法刀圭。洵稱敏捷。獨是奏刀之後。綳帶包紮。止有防護肌膚之能力。未聞有外治之藥。速其生長。而亦無內服良劑。助其化源。故必賴其人。氣血尙充。自能發育滋長。則雖經剝肉。猶可希冀全功。若在孱弱之軀。既受絕大痛苦。且去血已多。而日以憔悴。漸成不治。蓋已比比而是。近人亦多有言之者。則適以速之蹶耳。尙何神技之可言。且新學家絕無消腫解毒。化腐轉堅諸術。一似苟有外瘍。則除操刀一割以外。必無第二法門。何如守吾故步。未成可消。已潰可斂。退毒圍毒。散腫化堅。提毒止痛。去腐生新。各有靈丹。各有步驟。可以按部序班。悉收實效。內服外敷。循次用藥。之有利無弊乎。書成二卷。雖理法亦復無多。而巨旨宏綱。蓋已無不備具。因以瘍科綱要名之。并將師門各種外治藥物。以及鄙人三十年經驗心得。具錄於篇。無一非百用百效。如操左券。此皆向之所謂專家秘授。不肯示人者。壽頤則謂與其私之一家。悠久必致失墜。孰若公之海內。傳習乃可流通。且以見得吾華國粹。治瘍雖曰小道。固亦自有淺顯簡捷。易學易能。手到病除。絕無痛楚者。此編問世。殆足以發墨守。鍼膏肓。而起廢疾。書生積習。居然志在蒼生。是亦吾宗橫渠氏所謂民胞物與者。言念及此。良足自豪。昔在甲寅之歲。先業師翹設中醫專校於家塾。命頤襄助爲理。編輯各種講義。實開近十年來中醫各校之先河。嘗詔頤曰。吾家治瘍經歷五世。確有心得。汝從吾遊者二十年。隅坐傾談。吾無爾隱。今後纂集瘍科專書。務必闡抉精微。說破古人未言之奧。爲世之習是科者。示以正鵠。庶乎吾家良法。得以昭垂於天壤。斯爲不負吾行道五十年濟人利物之初衷。壽頤起而誌之。不敢忘。不意

黃牆醫校。擬始甫及再周。而先師遽於丙辰秋仲。竟歸道山。頤竊痛吾師資志以歿。未觀厥成。不無遺憾。然自有黃牆中醫學校之名稱。而十餘年間。滬埠杭垣。遠暨晉粵。中醫專校。漸次成立。不可謂非吾師當年破天荒之氣求聲應。而不才如頤忝膺蘭校講席。卽以從前編纂舊稿。重爲整理。賡續從事。光陰荏苒。倏又八齡。差幸約略脫稿。今復更訂此編。藉以證明師門家學淵源。其來有自。是卽所以上慰吾師在天之靈。卽以完成先師未竟之志。吾師有知。其亦含笑九京。而不以壽頤爲有負傳薪之一脉也夫。爰識始末。以告世之讀是書者。時在

丁卯之歲春仲之月嘉定張壽頤山雷甫重訂舊稿於浙東蘭谿之中醫專門學校

瘍科綱要目錄

卷上

第一章 外瘍總論	一
第一節 論陰證陽證	一
第二節 論腫	三
第三節 論痛	五
第四節 論癢	八
第五節 論痠楚不痛	一〇
第六節 論頑木不痛	一一
第七節 論腫瘍辨膿之法	一二
第八節 論膿之色澤形質	一五
第九節 論潰瘍之水	一七
第十節 論潰瘍之血	一八
第十一節 論瘍科之外感六淫	二〇
第二章 外瘍脉狀	二二
第一節 諸脉總論	二二

第二節 浮沉之脉	二三
第三節 遲數之脉	二五
第四節 大小之脉	二六
第五節 滑濇之脉	二七
第六節 長短之脉	二八
第七節 虛實之脉	二九
第八節 弦緊革牢之脉	三〇
第九節 芤弱微散之脉	三〇
第十節 緩脉	三一
第十一節 芤脉	三一
第十二節 動脉	三一
第十三節 伏脉	三一
第十四節 促脉	三一
第十五節 結代之脉	三二
第十六節 上魚入尺	三三

第三章 治瘍藥劑……………三

第一節 總論……………三

第二節 論腫瘍退消之劑……………三

第三節 論腫瘍內已成膿之劑……………四

第四節 論腫瘍行氣之劑……………四

第五節 論外瘍治痰之劑……………四

第六節 論外瘍清熱之劑……………四

第七節 論外瘍理濕之劑……………四

第八節 論外瘍溫養之劑……………四

第九節 論外瘍補益之劑……………四

第十節 論外瘍提膿托毒之劑……………五

第十一節 論潰後養胃之劑……………五

第十二節 論瘍科通用丸散……………五

第十三節 論外治之藥……………五

卷 下

第四章 膏丹丸散各方……………五

第一節 退毒丸藥方……………五

蟾酥退毒丸……………五

牛黃丸……………五

消疔丸……………五

鐵掃丸……………五

沉香散 附新方九痛丸……………五

薑黃二仁丸……………六

海金砂丸……………六

重定兒科萬應錠……………六

第二節 薄貼各方……………六

清解薄貼……………六

溫煦薄貼……………六

成煉藥麻油……………六

黃連膏……………六

象皮膏……………六

錫養油膏……………七

樟丹油膏……………七

水楊油膏	三
第三節 退毒膏丹	三
四溫丹	三
千槌膏	三
獨聖散	三
碘酒	三
第四節 退毒敷藥	三
溫煦丹	三
桃花丹	三
第五節 圍毒移毒	三
鐵井闌	三
第六節 化腐搜毒收濕止癢諸方	三
三仙丹	三
拔疔散	三
黑虎丹	三
五虎拔毒丹	三
天仙丹	三

集仙丹	三
三釐丹	三
八仙丹	三
蛇牀子散	三
蘆甘丹	三
二龍丹	三
血餘膏	三
枯痔散	三
烏金膏	三
黑龍丹	三
金棗散	三
碘汞膏	三
玉糊膏	三
拔管方	三
錫灰膏	三
獨鍊硫	三
第七節 洗滌諸方	三

架波匿酸洗法	九
硼酸洗法	九
第八節 止血諸方	九〇
紫金丹	九〇
金刃獨聖丹	九〇
第九節 生肌諸方	九一
十全丹	九一
象皮膏	九一
珊瑚粉	九二
麟龍丹	九二
滑脂粉	九二
成鍊珠粉	九二
烏芋粉	九三

第十節 咽喉口舌諸方	九三
新定加味冰硼散	九三
新定加減錫類散	九四
咽喉獨聖散	九五
新定膽製咽喉藥	九五
虛喉吹藥	九六
血餘散	九七
開關神應散附針刺法	九八
第十一節 耳目諸方	九八
磨雲散	九八
點眼藥水	九八
聾耳流膿藥	九八

瘍科綱要卷上

嘉定 張壽頤山雷甫 撰

第一章 外瘍總論

第一節 論陰證陽證

瘍科辨證。首重陰陽。然陰陽二字。所包者廣。不僅以熱證爲陽。寒證爲陰。紅腫焮起爲陽。平塌堅硬爲陰也。王洪緒外科證治全生集齟齬然以癰疽二字。判分陰陽。謂高突紅腫者爲癰。爲陽證。堅塊不紅者爲疽。爲陰證。世之治外科者多宗之。雖曰借此字面。以示區別。尙無不可。然顧其名必思其義。一字自有一字之確詁。必須切合訓詁本旨。而後名正言順。可爲後學法守。其亦知癰疽二字之本義乎。癰者壅也。疽者止也。皆爲氣血壅閉。遏止不行之意。本是外瘍籠統之名詞。無所軒輊於其間。何嘗有一陰一陽之分別。豈可自我作古。強爲分析。而謂古人製字。當如吾意。獨具見解。此土豪劣紳。武斷鄉曲之故智。大不可也。醫宗金鑑外科心法。不問陰陽。統稱癰疽。最是通論。凡古書之外瘍名詞。或稱某癰。或稱某疽。皆當認爲籠統之辭。斷不可誤信王氏之說。而執癰疽二字。妄爲分別。惟陰陽二證。雖無代表之字面。而未嘗無

界限之可言。但取義亦非一端。必須融會貫通。悟徹至理。而後見微知著。直決無疑。有可以經絡之部位分陰陽者。如頭面爲陽。背後爲陰。股外爲陽。股內爲陰之類是也。有可以人體之向背分陰陽者。如面前及胸腹之部多陽證。腦後及腰背之部多陰證是也。古者聖人南面而立。嚮陽而治。故面前屬於陽。背後屬於陰。確有至理。有可以病因之寒熱虛實分陰陽者。如熱病皆陽證。寒病皆陰證。實病多陽證。虛病多陰證是也。有可以病勢之遲速分陰陽者。其來也疾。三日五日而其形已巨者。皆陽證。其來也緩。旬日匝月而無甚變遷者。多陰證是也。有可以病形之淺深分陽陰者。發於膚表之間。不着筋骨而支體之運動自如者。皆陽證。發於肌肉之裏。推筋着骨。而身軀之動作不便者。皆陰證是也。有可以腫勢之堅輦分陰陽者。如其腫堅凝。按之如石者。多陰證。其腫雖巨。按之猶和者。多陽證是也。有可以痛勢之緩急分陰陽者。如暴戾迅速。掣痛猛烈者。多陽證。頑木不仁。痛反和緩。或但覺痠楚牽強。竟不作痛者。多陰證是也。乃或者必以焮赤高腫爲陽。漫腫不紅爲陰。但就表面言之。似亦未嘗不確。不知瘍患皮膚殷紅者。其病最淺。僅在腠理之間。所以膚表易於變色。如暑月熱癰。痲疹。疥疥之類。皆非外瘍重要之病。或則肌肉柔輦之部。如臍內腋下股陰。臍中諸處。及其人之骨小肉脆。肌膚柔白者。生瘍往往發紅。此則陽證雖多紅腫之候。究之紅腫一端。未可定爲陽證之代表。且亦有明是陰證。而皮膚必發紅腫者。如腦疽背疽。病在太

陽寒水之經。脉多細小。舌必白膩。均是陰證之確候。而外形亦或高突發紅。則以此病初起。必先發見黍米一粒。頭白根堅。病卽在於肌膚之間。故能皮膚變色。此紅腫不足以概陽證之確據也。若夫瘍發於肌肉之裏。去皮毛尙遠。則內縱成膿。而膚表必不改色。或肩背肌膚緻密之處。及其人之色蒼皮老者。發瘍雖淺。色亦不變。又何得因其不紅。而概謂之爲陰證。要之見證論證。分別陰陽。務必審察其人之氣體虛實。及病源淺深。而始有定論。望色辨脉。兼驗舌苔。能從大處着想。則爲陰爲陽。屬虛屬實。辨之甚易。若僅以所患之地位爲據。已非通人之論。而顧拘拘於方寸間之形色。亦祇見其目光之短淺。究竟於病情病理。兩無當也。

第二節 論 腫

外瘍形勢。皮相者恆以發腫之大小緩急。辨別輕重而已。然其實不可以外形論也。要在視其病源之淺深緩急。及部位之虛實險夷爲主義。故有發腫甚巨。其勢可畏。而治療得宜。功成反掌者。亦有堅塊尙小。貌若易療。而費盡手續。始終不應者。此非醫家之伎術有良窳。誠以受病之源。萬有不齊。初不可以一例觀也。若但以外形論之。大率腫在皮膚之表。肌肉之中。雖有大瘍。尙多易治。若在筋骨之間。大節之界。起

病雖微。亦多難療。凡外瘍之淺者。腫必高突。而根圍收束。不甚平塌者。最是佳象。若散漫不聚。毫無畔岸者。則多棘手。而其深者。初發時。但痠痛不仁。甚者且微痠而不痛。然皮肉如故。無所謂腫硬堅塊也。至數日而重按之。始覺其中有僵硬之處。然後漸以延開。其勢日巨。而尙無高突形象。其皮膚之色澤如故。其膚表之肌肉亦如故。此附骨大疽。發腫之次序。病家恒不自知爲瘍證者也。若以腫勢之已發見者言之。則堅腫而四圍分明者。其證順。堅腫而畔岸散漫者。其證重。非毒勢之不聚。卽元氣之不充也。若堅腫大痛。按之四圍皆硬。而其中有一點獨軟者。則內已成膿矣。亦有軟腫散漫。杳無邊際。其人但苦其重而不作痛。則氣血大衰。斷非佳狀。此證甚有成膿而始終不痛者。蓋其人正不勝邪。神經之知覺不靈。邪正已不能相爭。所以毫不知痛。最爲敗象。又有病起皮膚間。一粒如黍。上有白頭。其形如暑天痲瘡之狀。故吾吳俗語。謂之毒痞子。而皮膚肌肉。絲毫不變。無所謂腫也。然黍粒雖小。而或癢或痛。或且頑木。如失知覺。經脈不利。牽強不仁。則必爲外瘍大證。延至三日五日。而根圍漸大。腫堅且深。其後腐化。必不甚小。此腦疽背疽腹皮癰及疔毒等。諸大瘍之腫勢也。若頭面額顙。頤頰口唇間。見此黍粒。而或爲麻木。或爲癢痛者。則尤爲疔毒之重候。初亦不腫。至其漸形腫硬。而大波軒然作矣。若頭面漫腫。無此黍粒。其腫或堅或軟。或亦作痛作癢。頃刻而起。其勢甚速。或有寒熱。或無寒熱。則大頭疫也。此證病家必以爲外瘍。而瘍科或且不識。妄用刀鍼敷藥。